



हनुमान चालीसा

श्रीगुरु चरण सरोज रज निज मनु मुकुर सुधारि ।
 बरनऊ रघुवर विमल जसु जो दायकु फल चारि ॥
 बुद्धिहीन तनु जानिके, सुमिरौ पवन कुमार ।
 बल बुद्धि विद्या देहु मोहि, हरहु कलेश विकार ॥

जय हनुमान ज्ञान गुन सागर । जय कपीस तिहुँ लोक उजागर ॥१॥
 राम दूत अतुलित बल धामा । अंजनि पुत्र पवनसुत नामा ॥२॥
 महावीर विक्रम बजरंगी । कुमति निवार सुमति के संगी ॥३॥
 कंचन बरन बिराज सुबेसा । कानन कुंडल कुंचित केसा ॥४॥
 हाथ वज्र औ ध्वजा बिराजे । काँधे मूज जनेऊ साजे ॥५॥
 शंकर सुवन केसरी नंदन । तेज प्रताप महा जग वंदन ॥६॥
 विद्यावान गुणी अति चातुर । राम काज करिबे को आतुर ॥७॥
 प्रभु चरित्र सुनिबे को रसिया । राम लखन सीता मनबसिया ८॥
 सूक्ष्म रूप धरि सियहि दिखावा । बिकट रूप धरि लंक जरावा ॥९॥
 भीम रूप धरि असुर संहारे । रामचंद्र के काज सवारै ॥१०॥
 लाए संजीवन लखन जियाए । श्री रघुबीर हरषि उर लाए ॥११॥
 रघुपति कीन्ही बहुत बड़ाई । तुम मम प्रिय भरतहि सम भाई ॥१२॥
 सहस्र बदन तुम्हरो जस गावै । अस कहि श्रीपति कंठ लगावै ॥१३॥
 सनकादिक ब्रह्मादि मुनीसा । नारद सारद सहित अहीसा ॥१४॥
 जम कुबेर दिगपाल जहाँ ते । कवि कोविद कहि सके कहाँ ते ॥१५॥
 तुम उपकार सुग्रीवहि कीन्हा । राम मिलाय राज पद दीन्हा ॥१६॥
 तुम्हरो मंत्र विभीषण माना । लंकेश्वर भये सब जग जाना ॥१७॥
 जुग सहस्रत्र योजन पर भानू । लील्यो ताहि मधुर फल जानू ॥१८॥
 प्रभु मुद्रिका मेलि मुख माही । जलधि लाँघि गए अचरज नाही ॥१९॥
 दुर्गम काज जगत के जेते । सुगम अनुग्रह तुम्हरे तेते ॥२०॥

राम दुआरे तुम रखवारे । होत न आज्ञा बिनु पैसारे ॥२१॥
 सब सुख लहै तुम्हारी सरना । तुम रक्षक काहू को डरना ॥२२॥
 आपन तेज सम्हारो आपै । तीनहुँ लोक हाँक ते काँपै ॥२३॥
 भूत पिशाच निकट नहि आवै । महावीर जब नाम सुनावै ॥२४॥
 नासै रोग हरे सब पीरा । जपत निरंतर हनुमत बीरा ॥२५॥
 संकट तें हनुमान छुडावै । मन क्रम वचन ध्यान जो लावै ॥२६॥
 सब पर राम राय सिर ताजा । तिनके काज सकल तुम साजा ॥२७॥
 और मनोरथ जो कोई लावै । सोइ अमित जीवन फल पावै ॥२८॥
 चारों जुग परताप तुम्हारा । है परसिद्ध जगत उजियारा ॥२९॥
 साधु संत के तुम रखवारे । असुर निकंदन राम दुलारे ॥३०॥
 अष्ट सिद्धि नौ निधि के दाता । अस बर दीन जानकी माता ॥३१॥
 राम रसायन तुम्हरे पासा । सदा हो रघुपति के दासा ॥३२॥
 तुम्हरे भजन राम को पावै । जनम जनम के दुख बिसरावै ॥३३॥
 अंतकाल रघुवरपुर जाई । जहाँ जन्म हरिभक्त कहाई ॥३४॥
 और देवता चित्त ना धरई । हनुमत सेई सर्व सुख करई ॥३५॥
 संकट कटै मिटै सब पीरा । जो सुमिरै हनुमत बलबीरा ॥३६॥
 जै जै जै हनुमान गोसाई । कृपा करहु गुरु देव की नाई ॥३७॥
 जो शत बार पाठ कर जोई । छूटहि बंदि महा सुख होई ॥३८॥
 जो यह पढ़े हनुमान चालीसा । होय सिद्धि साखी गौरीसा ॥३९॥
 तुलसीदास सदा हरि चेरा । कीजै नाथ हृदय मँह डेरा ॥४०॥

पवन तनय संकट हरन, मंगल मूर्ति रूप ।
 राम लखन सीता सहित, हृदय बसहु सुर भूप ॥

